

本朝分省人物考

人物考卷之一百五目錄

陝西鳳翔府

王 邕

霍 瑄

田 濟

閻仲實

張 撫

李 善

李 璽

楊 武

補遺

閻 价

虎 臣

王 億

閻 欽

漢中府

王信

張羽

張鳳翔

平涼府

巨敬

趙時春

林廷玉

鞏昌府

門克新

張翼

張錦

閻仲宇

宋琮

蘇民

范鏞

胡纘宗

馬昊

王璠

侯一元

暢華

周蕙

本朝京省人物考卷之一百五

陝西

鳳翔府  
平涼府

漢中府  
鞏昌府

王 沔

王沔鄆縣人自太學生授蘇州府同知歷應天府治  
中山西右叅政山東左布政使所至有惠政及民正  
統中陞行在工部左侍郎尋進尚書居工部八年營  
建宮殿百工政令沔贊畫之功居多正統末請老致  
仕歸家十五年以疾卒遣官諭祭沔篤實廉慎而才  
亦精敏歷官四朝有譽無過老益狷介不阿是時王  
振用事沔數被侵侮故未衰卽引年而退

霍瑄

霍瑄鳳翔縣人發身鄉舉授山西大同通判久之以薦陞知府正統十四年英廟北狩逆酋也先擁衆奉車駕至城下守城者戒嚴不敢啓瑄感慨奮不顧身從水竇匍匐出謁叩馬嗚咽進膳羞靴袍百物悉出府藏金帛以犒虜衆英廟深致嘉嘆秩滿遷山西左叅政食正三品祿仍掌府事英廟復郡召陞工部右侍郎未幾轉左明年賜二品服帶成化初因冒其屬司郎中何經被經訐其不法事以聞朝廷雖不之罪然瑄由是鬱鬱不自安尋以老乞致仕

居京師久之不歸至是卒瑄質樸少文勤於幹理大  
同一節尤出一時忠愛惻怛之誠故寵遇始終時不  
以爲過也

田 濟

田濟麟遊縣人成化六年由進士守大名改守真定  
下車初裁吏弊治民隱興學勸士鋤強扶弱明年夏  
秋瘟瘡交作遂施藥以療疾苦死無依及屍暴露者  
給棺瘞之歲災荒斗粟百錢餓莩盈途濟不待上報  
開倉賑濟分糶官粟三萬餘石募其市價每米一斗  
銀五分絕多糶販糶之徒又巡歷州縣賑過糧米二

十七萬有奇全活者不可勝數性剛直不屈勢要定國公弟徐永宜殺佃民濟卽奏聞問擬充軍平山民常清武強民解琪等十數人被誣強盜獄成至卽釋之其軍衛詞訟剖析均平不待拘執而自來成化六七年間旱澇相仍會禮部派猪羊雞鶩皮張等項以十分爲率乃具奏減免五分永爲定例戶部派豆萬石設法措銀九十餘兩差人納之及八年九年飢饉洊臻將戶口食鹽糧鈔具奏折收米豆存留各驛支用又因站牛載運貢物不前累及小民乃奏以驢代之甚爲民便曲陽產有砒礞土歲起車搬運赴京民



不勝勞奏令各站轉運以蘇民困本府該買馬三千二百餘匹奏准通行各處俱免數萬餘匹蒞政八年境內大治民賴以寧

閻仲實

閻仲實字光甫隴州人生六七歲讀書日數千言過目輒成誦十五善屬文隨父靜樂君任岳陽屬邊報方殷所司承部檄選官民子弟習兵法武藝以備非常仲實與焉未幾盡通諸兵法尤善騎射而獨專力於學比游京師謁明儒學益進景奏丙子舉陝西鄉試第一成化己丑第進士既仕有官守猶不廢學益

大肆力於經籍汎觀約會充然有得發爲詩文質而  
不俚根極理致有葵菴集藏于家所儲書至萬餘卷  
爲書院建崇經閣貯之增建堂齋延師擇徒慨然以  
作人善俗爲已任爲考功隨人才器鑒別精當公論  
倚以爲重尤嚴馭下吏莫敢爲奸時宰好任耳目廉  
視幽隱時摘發之以爲明羣情慄慄仲實曰爲宰相  
當如泰山喬嶽察察非大體廉者以告一日謂之曰  
外人議我察察有諸曰有之得之何人曰公爲大臣  
第視其言當否以自修飾不爲無補不必求其人時  
宰素重然終以是忤未幾有河南之遷值歲凶人相

全通歷所部存省賑貸暑雨祁寒未嘗告勞賴以全  
活者甚衆奔母氏喪扶襯徒跣三千餘里居父喪哀  
慟過毀治葬祭一遵晦菴家禮與人交敬雖久不衰  
遇貧與喪者樂爲賙助國子生華陰周某卒于京爲  
置棺斂歸其喪驛丞李廣客死子流落京師貧無以  
謀食鬻其孫爲贖還之給道里費以歸其爲德于鄉  
如此初謝事每謂人曰吾事畢矣歲月將不我延未  
屬續之前忽謂諸子曰吾某日將往先塋是日果卒  
亦異已

張撫

張撫字世安寶雞縣人幼敏慧異常初治尚書不舉  
景泰庚午春治禮記其年秋乃舉後又改治周易舉  
成化壬辰進士乙未授刑部主事歷員外郎中性剛  
決不畏強禦在刑部如都督同知王義劉寧廣寧侯  
劉銓及山西鎮守少監石巖各有罪衆莫敢決立訊  
決之是時浙江按察司副使張蕙罪惡彰聞矣使者  
畏其口莫敢誰何往治之隨服其罪進四川按察副  
使弘治戊申蜀大饑出俸金易米三百斛賑之民賴  
不孱踰四年陞湖廣按察使湖廣盜劇病民下令城  
中曰獲盜者予俸金時有獲盜者如數予之盜由是

志久之進雲南右布政使轉貴州左俱以績著十四  
年進南京太僕寺卿性資簡潔攻苦茹淡留務多暇  
手羣經終日誦讀靜中多所自得不入義外一錢無  
何進左副都御史督儲南京居逾年督完每詣闕奏  
議 孝宗多俞行之乞致仕不允尋進南京刑部左  
侍郎明年復乞老命乘傳歸其鄉撫精於吏事所在  
以廉明稱其質厚少緣飾盖出于天性云

李 善

李善字宗元隴州人舉成化丁酉鄉試明年戊戌舉  
進士授行人司行人出使慶府王以金幣贐不受三

年選南京廣西道監察御史是時太監梁芳怙寵市權而南京太監郭鏞亦橫擅入後湖乃與同官繆樗等上疏極言尋出清理江北諸郡尺籍刮弊剔蠹以影射出者八百人有奇弘治戊申以父喪歸終制改浙江道巡按遼東是時總兵官羅雄偷安弛備太監韋郎縱其舍人侵漁軍餉奪人妻孥聞善至卽懼不敢復爲都督王鎧孫貴皆以不職劾罷及代歸而壽寧侯張鶴齡方負勢莫敢誰何族子舍人下上運河沮擾貿易拷掠無辜謗怨載途至是有訟者善曰教授侯門之鈴束弗嚴故至此矣於是叅其教授姚倫

就問教授懼走匿侯所不出於是劾侯出教授就問而侯家以罪發戍者若干人京師遠邇譁然皆知有李御史也然侯實不堪復求疵撫拾善訴之天子震怒欲置於理是時在司禮監若陳寬一二人皆識體苦爲諫止無事遂擬河南按察司僉事去而都指揮李賢者守備河盧濫受民詞納賄無厭會善分巡河南道乃劾罷去是時河決張秋都御史劉大夏與太監平江伯偕來督修乃求綜理其事者藩臬以善應善爲相度水勢開修賈魯河四十八里改河南注築塞黃陵缺口百十餘丈斷水東流功垂成復決僅

以身免乃更修數月功乃成詔陞俸一級未幾太孺人卒乃歸十一年復除湖廣分巡有河淮者與其徒五百人僭號稱王攻陷城池劫掠鄉聚居民大驚恐不可撲滅呂高者襄陽衛指揮也善捕賊乃以委高而身自微服出入賊窖中覘賊以計擒獲之事平詔陞俸一級其後王景陽者亦荆襄人以左道惑衆其黨能彥和以子妻兩人皆稱王謀入襄陽內亂未發而善覘知之亟遣呂高往捕得彥和等及其妖書解送京師餘脅從五百人有姓名籍記焚其籍不問十三年推山東按察使副使兵備臨清日報錦衣衛



衛千戶劉海與一校尉同乘舟至聲勢甚大見而疑之執劉海下拷問對曰我京師人曾貴也校尉僕曾喜耳曰劉海詐也聞者咸以爲神十七年擢山西按察使是時晉王寵宦者門副劉茂倚以爲奸凡府中金貨輒匿衆無敢言茂與府中人李成有隙詐以王命逼成幾死成訴之巡按下問於是捕劉茂茂急附王王爲之請不從竟捕劉茂處死其後劉瑾用事欲爲茂復讐然竟亦不能害也正德丙寅擢四川布政使未幾轉左四川番夷久肆標掠百姓患苦之巡撫都御史鎮守太監具奏出師征之乃請於鎮巡曰當

用兵幾何曰非十萬人不可善曰民力殫矣番聞我師至必懼不若因而移檄宣布 朝廷威德讐服其心從而撫降之亦萬全之策也于是檄番果降誓死願爲良民而不敢復叛捷聞賜襲衣白金三年拜南京都察院右副都御史會同吏部考察南京庶官甚平乃自引乞休不許慰留之本年轉南京刑部右侍郎會尚書缺員獨理部事獄死囚三人將行刑善以未經覆奏止之明日邸報至三人者移江西巡按御史勘問衆皆嘆服庚午陞南京工部尚書會修孝陵及懿文諸寢殿皆會計甚悉未久疾作罷歸辛巳

世廟卽位 覃恩臣下於是有司問勞具羊酒綵幣  
尋又奉詔進階光祿大夫卒年八十有二

李 璽

李璽字朝信鳳翔府人幼醇不戲在羣兒中嶄然頭  
角里中共竒之父曰家世爲農不識毛錐何物恐讀  
亦無益尋遣從里學究受讀卽日記千言十二善文  
章二十舉成化甲午鄉試第一屢上南宮不第於是  
讀書城北僧舍自炊食者數年乃第弘治丙辰進士  
授荊州府推官決獄平無冤又捕巨盜數百郡中稱  
之當道交章論薦起爲監察御史嘗出按河南山東

後按直隸諸郡縣會劉瑾用事事多掣肘璽一切任  
法無所假貸獨立不附由此忤瑾矯旨逮獄踰月出  
左遷鄧州判官踰半歲又降貴州平溪驛丞在平溪  
一年乃陞襄陽知縣復超拜兵部員外郎主敎武學  
一時勲貴子弟仰德服量俛首傾心靡然向化矣居  
無何復超拜河南按察司副使折獄聽政務持大體  
不苛察細故以爲明會大旱傷禾禾且枯萎民磬磬  
無策乃授以桔槔制教之厚水灌禾竟以有秋正德  
乙亥以疾乞歸進秩按察使致仕旣歸五年乃卒年  
六十有七爲人厚外樸中與人語吐實不欺不言人

過雖酣後或飮之言輒一大笑而止親愛者愈衆門外多長者車轍自起家至按察使家徒四壁立朝夕餬口無餘貲爲子孫地爲御史時邸舍瀕水乃種樹當屋種蔬當肉種葦當竹結茅其中日與鄉士觴咏甚樂也赴襄陽過洞庭羣盜操刃入舟旣見無何有相與嗟嘆羅拜以斛米饋謝無狀笑遣去比屬纊僅能具棺殮

楊武

楊武字宗文岐山縣人姪時母夢月墮其懷生而神骨特異早失怙恃煢然孑立丙辰舉進士丁巳出知

淄川縣是時縣治久廢武下車鋤惡弭盜修繕城池  
疏理冤滯勸課耕織積粟待拯拓學規崇賢祠興詩  
書賑貧乏乏科且百年一時得雋者數人彬彬與名  
邑敵有盜市人稷米者求之不得攝其鄰居數千人  
跪于庭而漫理他事不問已忽厲聲曰吾得盜米者  
矣其一人色動良久復厲聲言之其人愈益色動指  
之曰第幾行第幾人是盜米者其人遂服又盜田園  
瓜瓠者是夜大風雨根蔓俱盡乃令印取夜盜者足  
跡布灰於庭攝村中之丁壯者令履其上而曰合其  
跡者卽盜也具最後一人展轉有難色且氣促甚執

而訊之果讐家而盜者也瓜瓠宛然在焉又一行路者於路傍枕石睡熟囊中千錢爲人盜去令舁其石於庭鞭之數十而許人縱觀不與禁乃潛使人於門外候之有窺覘不入者卽擒之果得一人盜錢者也聞鞭石事甚竒不能不來入則又不敢求其錢費十文爾餘以還枕石者此數事素嘖嘖人口典史陳瓚者黃巖老吏也嘗肆言侮慢怒鞭之於庭瓚急誣奏而淄川民千輩走闕下爲訟冤嘗出視淄河謂可溉田指示疏鑿處皆直故渠祝蝗蝗滅禱雨雨澍竟以有年召拜監察御史乙丑清理河南軍務及查盤軍

器前後凡三年尺籍器物罔不精審而風裁凜然正德丁卯代歸刷卷京畿道明年戊辰出按順天諸郡縣時劉瑾用事事多牽制不可行蕩然無所迴避罰米百餘石輸邊至於救任丘邊氏中傷之禍辨密雲李順殺人之誣卽劉瑾亦稱其爲真御史也已已擢大理寺左寺丞受勅勘視大同邊務若屯田不均軍役耗損諸弊政釐正裁革彈劾不少避邊人頌焉明年庚午超拜左僉都御史巡撫宣府罷歸乃於城外置墅構寶檣堂藝植花竹必成行列一器一物罔不精好性不喜酒而風致甚高邈與親故舉觴以爲樂



天順甲申以疾卒享年六十九歲

閻 价

閻价字允德陝西隴州人成化二十年進士由庶吉士授浙江道御史弘治五年查盤松茂邊儲巡按河南值劉瑾亂政力奏之罰米五百石稱貸納之家爲一空陞四川叅議疏請致仕

虎 臣

虎臣鳳翔府麟遊縣人自幼慷慨直躬與人寡合凜有氣節不規貨利成化末以歲貢士入太學時 憲宗於萬歲山起棕棚登眺臣具疏極諫祭酒懼禍以

銀鐺繫臣堂樹上俄有官校宣臣至左順門中官傳  
溫旨勞曰爾言是棕棚卽拆去所上疏留中不出毋  
用該部復奏也祭酒聞而大慚自是臣名遂聞天下  
先是陝西巡撫鄭時具疏請賑難齎疏人臣請往至  
京旣上疏請吏部戶部泣而言情辭懇至諸大臣咸  
動色遂大獲賑焉其語甚壯至今人猶傳之諫棕棚  
時有旨許選授七品正官後選雲南楚雄府鄆嘉縣  
知縣卒於官人甚惜之

王億

王億字本一號立菴陝西鳳翔府人弘治乙丑進士

年正德丙寅授閔鄉令閔鄉故衝罷邑也又多中  
貴人往來百姓患苦之力爲裁抑中貴人無敢橫者  
縣稱大治憂歸服除補濬縣甫數月濬又治陞刑部  
主事歷員外郎陞山東按察司僉事始至值武廟  
南巡都御史檄以迎駕臨清事多倚賴焉明年分巡  
遼東是時太監于喜鎮守遼東往僉事見太監禮與  
都御史等而喜又怙寵諄謾者億輒踊道入上坐抗  
禮喜始怒已知其清直卒讓之嘉靖甲申陞河南布  
政司叅議丙戌督餉京師有張舉者太監忠之弟  
武廟時故都督也嘉靖初以倖陞革罷而驕縱豪奪

如故先是舉令人攬河南歲餉侵沒至數萬金億曰  
不發舉奸狀窮治之卽租無完期也乃召諸吏卒束  
舉廷下杖訊之舉惶恐以首觸地謝無狀死罪乞寬  
假益大怒復杖訊之辭驗伏罪乃復榜笞數十餘狀  
其罪刑部未具獄而舉死獄中於是太監忠與武定  
侯郭勛主令舉家許奏 上大怒下詔獄給事中張  
達上書白叅議無罪及言刑部不正其獄刑部尚書  
趙鑑意有觀望宜罪之於是罪刑部各罰俸有差竟  
以中旨謫億戍海南衛終身縉紳中談風力氣節者  
皆稱王叅議云明年刑部侍郎胡世寧爲 上言請

以所以彰直節不報居海南五年而當嘉靖辛卯  
如赦歸鄉里億受經按察使李木菴先生木菴質任  
簡默而億負氣剛毅然于鳳翔均稱賢大夫卒年八  
十有四

閻欽

閻欽字子明隴州人正德戊辰進士選吏科給事中  
欽在吏科前後凡七年不肯阿附孽寺嘗抗疏勸  
毅皇帝視朝諸凡封駁不避權貴而同列彈劾諸疏  
多出其手其中有漏言者當道忌之乃遷河南兵備  
蓋嘗推演武侯八陣圖爲九曲新書刊布以訓戰士

募義勇斥老弱脩城塹謹烽堠遠近恃以爲安汝寧  
南陽護衛官軍橫甚擾民殆不可制欽請入操而其  
患遂息汝寧民兄弟爭田各誣其子不法而其子皆  
習舉業者法當黜欽以數語決之而兄弟感悟不爭  
而退羅山勢豪張輔者殺其妾之母死妾母之族訟  
諸縣吏輔又誣以他事陷獄死乃以病告知其狀執  
輔抵死信陽貧富兩民爭田里中二惡少素怨富民  
乃誘貧者殺之而自殺貧者以滅口誑其守曰自相  
殺耳按之曰一人先死後死者殺之誰也具得惡少  
斬之以徇劉學恒者汝寧大盜也隴養死士肆行劫

掠無敢言者通賄郡吏伺動止屢捕不獲乃假以公  
事過其地執而論之死其黨解敢數百人於是遠近  
駭嘆明歲嘗大旱禱雨卽大雨浹境遂以有年中州  
之墟盜息民安風教大行撫按前後凡六論薦超拜  
可跂乃蒙婁菲之謗以歸用不寃其才識者以是爲  
歎云

漢中府

王信

王信字君實南鄭人正統中世官寬河千戶父忠北  
征戰歿母岳氏生甫半歲持節不改朝旌其門爲忠  
臣節婦已巳虜犯京師信拒戰西直門功陞指揮僉  
事景泰六年從征五開諸蠻遷指揮同知天順五年  
破曹賊東市遷指揮使成化初守通州改正倒馬關  
移守荆襄二年石和尚劉千斤反荆襄進據房陸民  
兵不滿千人賊四千餘衆突至圍信主帥逗遛不援  
信多張旗舉火晝夜不息歷四旬餘間以死士出城



五六里舉火砲賊以爲援兵至驚走追斬有功陞都  
指揮同知鎮臨清兼管倉糧移鎮湖廣條陳八事又  
條上慎專任實倉儲修兵衛禁科罰四事十七年疏  
言湖廣蠻夷雖腹中之蠹實無能爲但我軍奸黠之  
徒利其竊發可以邀功今但選精銳常加隄防勿蹈  
前非其患自息荆襄流通本意逃避徭役長子老孫  
已成家業濫加誅殺恐傷和氣南畝之農無所蓄積  
收穫未竟餽糧已空機杆纔停布縷何在乞選公正  
仁惠守令大加存恤濫陞官員無慮千百無一矢之  
勞冒崇階之賞乞查勘削奪三司方面所以折衝禦

傅承宣激揚當公以格物廉以律已所部指揮劉斌  
張全智勇過人力薦于朝且云英俊之子處心剛正  
寧肯抑心低首奔走媚求若不屈加攬訪則賢才多  
隱志士沈匿陞都督同知總理漕運卽日上道常語  
人曰荷國厚恩未能稱報此行當以江水洗滌肺腑  
少盡區區信沈毅簡重被服儒素出入省騶從歷鎮  
大邦不營私產平居默坐展玩經史寬袍緩帶糲飯  
蔬羹故人婚喪傾心賑恤出鎮三十年笥無華衣廐  
無肥馬鈴閣之下寂無人聲子繼善從善皆舉進士  
有名

張羽

張羽字伯翔號中梁漢中南鄭人也爲諸生時好學不問寒暑弘治辛酉領鄉薦乙丑登進士第以憂歸服闋授行人奉西蜀却其餽金一無所受先時受業師陳添福戍遼東羽恒念之一日有遼差隆冬險地人苦不欲去羽自請行且言有師在彼欲往候當途義之乃卒全師以歸是時冢宰銜羽疎闊兩選不與人以勸羽羽曰窮達有命耳正德初宦瑾用事執正不近瑾敗諸趨附者皆被禍羽始授御史遭流賊猖厥經略內外日夜戒嚴事平賚衣一襲巡按淮揚山

東刺舉無私比回所部吏以金餽正色拒之時宰以  
故人門生屬善視之至部按之則山東號三大害其  
中有二焉首劾去之會中官導上游獵錫予頗濫  
羽上疏力諫寢不報舉朝皆壯其奏然終以得罪時  
宰出守廣平至則選賢良退貪殘施行條教胥吏舞  
文者痛繩以法吏卒畏懾莫敢仰視雖隆寒盛暑漏  
下五鼓必起視事夜分乃寢訪獲積年民害充發配  
所餘悉以次徒遣而又和易近民視之如子加惠于  
鰥寡時賜之以衣食居處因刻羅氏諭屬文以勵僚  
屬創建漳川書院羣漳士高等者游業其中躬自督

課漳士日嚮于學彬彬著于科目若乃郡中賢士大夫里居者不問崇卑往候其家問民疾苦舉行之遂建開通水開田千畝以資困農奏表趙氏以勵婦節嚴禁縣官阿稱以一士風置木牌令得自白以達民情處方藥以劑貧病收積市利以蘇里甲當是時旁郡之訟咸願質成廣平視諸旁郡若大府焉吏有不法者率望風解組去順德囚母與僧通子已壯不改惡其子之言也乃入井死會當決羽曰母無行負夫與僧私通顧可殺子絕夫嗣乎因遂得釋鉅鹿有告婦奏一要宦暴殺其夫吏受委咸憚莫能決乃按而

諸法要宦懼厚賂朱寧誣奏下獄吏民爭斂錢贖  
寧爲羽求解曰吾寧失官不敢失志若等愛吾幸無  
枉吾志也大理直其誣乃還郡自後民益相信斷獄  
大省爲八郡最會調守河間士民泣而送之擁輿不  
能行去之日民有遺思懸像而戶祝之者河間郡中  
無賴數十恃豪橫干鄉曲則召地方當甲者謂曰若  
爲甲不緝捕奸俠顧令橫苦小民守姑貸若罪其密  
報以來於是武斷之豪悉斂迹改行郡中以清尼寺  
數十濁亂民俗乃廢其寺歸少尼于民之無家者卽  
其地立社學教郡中子弟又收恤嫠孤子養濟院舊

僚通判周禮素清苦死而妻子貧甚負貸莫能償諸貸家日督之羽乃延諸貸家以酒食曰若與周有鄉里分周故善吏也忍窘其妻子乎於是諸貸家多感動出券不復取乃擇僚地居周妻子親爲文祭于墓武宗皇帝南狩有司供帳吏緣爲姦率陽散官錢陰斂富室惟河間據郡中錢治具軍民不擾供帳以辦河間廣平京師股肱郡素稱浩穰難治聲名籍甚世宗卽位擢用良吏遷山西叅政分守大同改守冀寧道首捕妖賊下之臬獄晉人稱快尋轉江西憲使羽雖抱質敦厚生平不喜造請權貴當道嫌之乃左

遷貴州至則出納慎防吏不敢私一日吏白羨金舊  
不報羽盡以登籍久之晉南京大理寺卿多所平反  
有疾乞休上溫旨勉留未幾轉南京工部侍郎展  
修國學號舍數百間窮治假印吏除姦惡數十輩又  
部主事王度嘗捕京猾滕氏不法事王憂歸會內察  
滕說之于吏部欲黜王羽曰滕之暴橫京師誰弗知  
者王旣發其奸顧肯納其賄耶王得不黜尋再疏乞  
休會被推本兵時黠虜入寇三鎮告急乃不復敢言  
去頃之考績還以疾卒于淮上年六十有四初七歲  
時母病頭虱甚爲苦默取吞之乃不復生少受學於



陳生甚嚴時密歸省陳初怪之後知其爲母也益加  
愛重繼母楊淑人年少事之甚謹家貧好學雖羣輩  
嬉戲手不釋卷性謙抑寡言衣服居處喜儉素平居  
未嘗言人過亦不喜虛美人處家教子嚴而以正居  
平恂恂若無所能而見義必爲萬折不回手錄先賢  
要語帖置左右以自警切雖年逾六十位至九卿見  
僕吏鄉人未有情容按淮揚時泗州察院有妖劉御  
史至夜驚不能寢羽居數日妖不復聞後劉至不敢  
入名問守者云張公住時止見一鬼甚大捧藥跪牀  
下耳人相語以爲正能勝邪云

張鳳翔

張鳳翔字光世號伎陵子洵陽人生而異質殊才目  
羞日短眎然暗處則反明燈月之下猶晝也故其書  
窻晝必遮障而後親字左手橫書之興到筆飛瞬息  
滿紙與李夢陽同舉于鄉先是西崖公遺提學石淙  
公書曰今年榜張潛冠乎石淙公荅之曰設無李張  
二生潛不後矣及見試錄名第西崖公嘆且服曰遂  
老知人是時光世角尚壯業已夢寐屈宋步追班馬  
小視褒雄馳騁騷賦落筆千萬言奇字爛錯綺文輝  
奕觀者咸謂子安再生文考復出旣至京師王公大

人翰卿嗟客訪造其門求其識面者日殆無虛晷也  
于是聲名出李上然光世不以自居未始不兄事李  
而讓其精也及舉進士與李同部見其面黃憂焉居  
無幾晴亦黃察其身又黃問曰光世不病疸乎光世  
乃于是告休沐臥西山巖菴中居無何卒年三十耳  
子安二十九文考二十四先是人以二子擬光世不  
識乎李于是作哀鳳之操是時李夢陽與曹縣王崇  
文同爲部寮寔經紀其喪事馬考功輯其遺文七卷  
屬胡蘇州板之行然散帙者不少矣於戲嗇其年復  
思其文哉

平涼府

巨敬

巨敬平涼人伉直敢言建文中爲戶部主事靖難後被逮責問不屈死夷其族

趙時春

趙時春字景仁別號浚谷平涼人爲人嚴毅介特與士大夫處意有所不可議論有所不合必引繩按矩詰責之不少貸故賢者服其正而在中人咸疾其太剛幼與羣兒戲每列旗部署御之年十四舉陝西鄉試十八試禮部裒然爲舉首當是時海內伺其有所

製作爭傳誦之而時春則習騎射談甲兵日以邊備之不修爲大戚或語及北虜方持杯酒相歡笑輒裂眦攘臂誓不與俱生數謂所知曰使吾得備偏校領精兵五千人操勁弓巨矢間以長鎗大斧卽掩灘丘福不足平也再失官虜入犯遊騎薄都城世宗用薦召爲兵部職方主事遷山東按察僉事轉副使遷巡撫山西都御史提督鴈門諸關調兵部時疏請禁諛佞正士風又疏錄用諫官明善惡闢異端等七事下詔獄爲民暨改編修兼司經局校書疏請正東宮初會禮儀備文武官僚以崇國本在晉斥貪墨省征

衛抑請託絕餽遺曰吾不敢竊府庫以自潤亦不能  
借府庫以市恩宗藩貴宦相戒莫敢犯法一時文學  
氣節政事之聲振動天下而其志專在攘夷狄復  
祖宗之疆宇遺後世以長治永安虜寇代州身擐甲  
冒督兵繼進斬虜若干級而總兵李淩乘勝入虜伏  
中敗沒詔解官聽調卒以不起時春少讀書日記萬  
餘言凡史所載天文地理戶口錢穀多寡之數與寇  
戎蠻貊之詭姓隱名歷歷誦之無爽所爲文若詩豪  
詞律伸紙行墨滾滾而出若不經意而於古人之  
法度靡所不合說者以爲有司馬子長李白之風不

虛也荆川唐公於文士鮮所稱許嘗有言曰宋有歐  
蘇明有王趙其推重若此王謂遵岩也

### 林廷玉

林廷玉字粹夫其先侯官人父介菴韓府紀善玉幼  
隨任因籍平涼成化癸卯發解陝西甲午舉進士明  
年選授給事中時孝廟初元上封事乞順天抄之  
理通君臣之情出御文華延訪大臣政治之詳又上  
籌邊翊治十事劾太監黃贊之弟黃緣京職又蒐輯  
傳記釐爲入箴以保至治旣晉都諫論興濟官建真  
武廟及考官程學士敏政六事言皆剴切降判海州

遷知茶陵州乙丑陞江西屯田僉事己巳陞山西叅  
政丁繼母憂服闋陞右通政提督騰黃是冬陞右僉  
都御史巡撫保定等府兼提督紫荆等關凡勢宦貴  
戚相率斂戢又嚴捕巡軍之奸以杜響馬巢穴奏劾  
守備倒馬關太監李貴及翟都指揮張太僕丞之惡  
尋以張辯調南京都察院管事遂懇求致仕去嘉靖  
改元起改右僉都御史總督糧儲癸未又具疏懇辭  
得 旨致仕年七十九卒初介菴爲信宜司訓廷玉  
母徐卒于信宜火葬鳳凰山不封時玉方二歲稍長  
微知其故及出使廣東葬都憲魯公輶趨信宜披草



泣血遍訪父老得母葬所爲文哭祭圖其山形而去  
陳白沙聞之至錄其文爲詩以傳比介菴卒奔喪平  
涼念祖塋在閩復南展省立墓碑泣別歲甲子入覲  
途病還平涼就醫聞孝廟賓天哭臨于韓府墀下  
血淚點漬麻衣有痕提學廣東時焚黃酌祭于信宜  
哀痛之切足表士風嘗欲自平涼遷父葬于閩以人  
言未可搖動體魄而止乃留仲弟廷珣于涼以守丘  
墓自歸閩戊寅夏福州衛卒缺餉羣嘩爲亂閉城門  
擁利兵內外岌岌玉角巾深衣造壘示以朝廷恩  
威賊輒解散八月再亂再出撫定鎮兵因以夜擒渠

居福州用寧自退休後毫髮不擾于鄉里人皆德之  
蓋自始葬魯都憲及襄楚憲王妃時凡諸贈遺一無  
所取人已占其後矣陽明王公謂其碩德重望收曲  
突徙薪之功儀制郎中林炫謂剛大之氣常伸於萬  
物之上淵源之學自得於簡冊之外至于濟變之才  
又一時莫之與京也

鞏昌府

門克新

門克新鞏昌秦州人爲人寬厚和易始爲本州儒學訓導洪武二十六年秩滿來朝時天下學官入覲者咸命侍朝或試文辭詢問經史及民間政事得失在列者多應對不稱旨獨克新敷奏亮直上甚重之時紹興府儒學教授王俊華亦以善文辭稱旨遂擢俊華爲右春坊右贊善克新爲左春坊左贊善後陞禮部尚書未幾以疾請告命太醫給藥物不輟其祿已而病遂卒上嗟悼遣官祭之命有司護喪歸葬

於鄉

張翼

張翼秦州人舉永樂戊子鄉選授江西監察御史會歲大祲人人蹙額苧殣相屬于道上疏繪圖請賑濟詔愍之爲發帑金數十萬甦活甚多又江岸地斥鹵可田有司憚于開墾至則爲處牛種鑿渠道灌田萬餘頃民得殷富大臣劉觀貪婪無忌廷臣多彈射之然劉有寵于上言者反遭貶斥自是舉朝口噤心悸疏莫敢再翼忿然曰言官之職掌爲何誓不與劉共朝於是按其不法數事力劾之上爲感悟下劉

及子輻錦衣獄遣戍遼左中涓楊進等怙寵要恩請玉帶金鞍圖書等物引從征王瑾故事頗屬僭踰衆憚之不敢言復批鱗極諫事得寢中涓輩嚙指欲中傷之時與御史邵玘楊爵輩齊名臺閣生風焉卒以忌嫉者衆疏請致仕以歸

張錦

張錦字尚綱秦州秦安人舉成化乙酉鄉貢己丑成進士授刑部主事署員外郎鞫訊明審錄囚山東平反甚衆署郎中事益精判決獄無滯囚會他司失官金乃屬錦按之屢鞫不承遣人給其家得金示之遂

伏罪畿郡災用廷薦往賑先條奏便利至則平糴勸  
貸分遣良吏饘丐乞舉嫁娶掩骼埋胔游惰者給牛  
種督之耕築塘堤以定水患所活不可勝紀有邏校  
誣棗強武邑二縣民爲盜皆據理直之方山慶成二  
王府有大獄奉命往治還稱旨遷大理右寺丞再奉  
命治岷襄二府獄情罪皆協累遷右少卿 憲廟知  
名鳳陽有重獄特命之往尋擢都察院右副都御史  
巡撫宣府直枉除弊兵民畏服劾罷中官武將守備  
不職者間登陴望見武帥家假山甚麗怪之其家聞  
之遂自徹去虜報猝至或欲議請官軍適 朝廷遣

中使就議附奏以爲不必遣竟以無他請立萬全左衛龍門所學置天下武學歲貢額皆舊所未備也丁父憂服闋巡撫保定諸府兼督紫荆諸關未行遷官再勘湯陰府獄有貴臣爲都御史秦公紘所劾賊以萬數怙勢求免卒正其法丁繼母憂服再闕方復任未幾遽疾作辭俸不許乃請告特給驛歸未幾卒訃聞賜祭葬錦少有異質生窮邊無師友從釋氏學旋習老子及讀儒書始盡去舊習獨冠儒冠不避謔笑攻苦力學竟以所得取高第鄉之以儒顯者自錦始其爲人敦孝友重廉節早失恃事父甚謹撫諸弟無

間言憫窮赴急或假貸爲賑卹其在官勤敏強幹不爲事窘章奏明暢動數千百言又典刑獄尤精法比而能以寬恕將之歷佐臺省前後十五年資望俱積而不及大拜以沒論者蓋深惜之所著有松壑小稿宣政錄張氏宗譜若干卷藏于家

閻仲宇

閻仲宇字泰甫隴西人成化乙未進士初授鹽山知縣擢監察御史陞山東按察副使分理臨清時有妖僧稱彌勒佛以惑衆者仲宇擒之寘于法陞浙江按察使左布政使尋陞右副都御史巡撫湖廣時洞庭



漢間劇賊充斥苗復爲患仲宇先後設謀擒之捷  
聞降勅獎勞錄其一子爲錦衣衛冠帶總旗晉左副  
都御史未幾命督理宣大邊儲尋陞兵部右侍郎本  
部尚書奉勅提督團營仲宇資稟端重體貌魁梧爲  
御史時 憲廟眷注之居官悃悃以寬和爲政然所  
在稱治其爲尚書甫滿歲都御史劉宇巡撫大同以  
萬金賂瑾欲奪其位仲宇遂移疾求去再疏得允加  
太子太保賜勅給驛歸仍優以輿隸月廩廕錦衣百  
戶一人未幾以疾卒賜祭葬如例

宋琮

宋琮字廷用陝之隴西縣人成化十四年進士授吏科給事中歷陞吏科都給事中至太僕寺卿琮爲人篤實在言路時嘗有建白及官太僕尤究心馬政有可稱者弘治十一年七月卒于官賜祭葬如例

蘇民

蘇民字天秀別號乙峰秦州人自幼敏悟不凡稍長卽有文譽舉弘治乙卯鄉薦累試禮部登乙丑進士初授山西榆次知縣榆次健訟且善謗人難之下車公以蒞事廉以持已訟息而謗弭賢聲籍籍徵爲兵部主事時逆瑾擅權構之落職爲四川潼梓驛丞毅

然就道在任盡職無悔時蠻夷叛撫按李公進勦民  
自領支兵征虜斬獲甚多辭不敢當兵功亡何瑾誅  
復官爲工部主事管理山東徂徠等處泉源改吏部  
考功司主事陞驗封司員外郎調考功文選兩司陞  
驗封司署郎中爲諫止巡遊事奪俸六月再調考功  
司署郎中時奉例凡諫止巡遊官跪廷受杖者得陞  
俸一級乃調文選司郎中文選據要地多所嫌疑處  
之特有清譽乃陞太常寺少卿以祭掃例請 上俞  
之畢事復任陞南京太僕寺卿馬政修舉召改光祿  
寺卿樽節財費歲以萬計陞太常寺卿提督四夷館

尋陞工部右侍郎丁母憂家居數載清修自持一毫不以干人服闋日改南京兵部右侍郎嘗署工部事八月餘司廳以直廳百金奉辭曰我自有應得者此何以爲南都人士服其廉且當也滿一考例當給由道經榆次榆次爲舊治縣人父老百姓至萬人要迎入縣則又挽留遮道不欲行甫入京適刑部右侍郎闕吏部䟽名上上卽用之以南京工部修理孝陵功賞曰金二十兩織金紵絲二表裏甫兩月疾卒得壽六十有三

范鏞

范鏞華昌衛人系出文正公後成化二十二年舉鄉  
魁弘治六年成進士授中書舍人選湖廣道監察御  
史鯁直敢言不避權倖因忤 旨下錦衣衛獄旋得  
釋補浙江僉事歷四川副使浙江叅政尋晉按察使  
所在釐姦起廢約已愛民而民亦戴爲慈母畏爲神  
君尋陞南京操江右僉都御史巡撫雲南右副都御  
史時逆瑾用事兵部尚書王瓊附之鏞秉直嫉邪動  
與瓊左瓊中之因降湖廣布政司右叅議卒于官生  
平大節不與時俗浮沉遇事直言權倖憚之然亦以  
是逮獄謫官後瑾黨被收中外交章表揚之詔復原

官賜葬祭得廕子謚恭惠

### 胡纘宗

胡纘宗字孝思陝西秦安人穎悟夙成蚤歲以春秋爲邑學生提學遂菴楊公虎谷王公咸愛重之中辛酉鄉試繼登正德戊辰進士授翰林檢討與修撰呂柟叅對 孝宗實錄成賜金幣加俸一級以事謫嘉定州判官歷二載陞潼川州知州俱有惠政乙亥陞南京戶部員外郎已卯陞吏部驗封司郎中未幾陞安慶府知府時值逆濠兵後民皆竄去又 武皇駐蹕留都供御繁劇刻期履任時夏旱秋澇大舉荒政

上下又安明年癸未移守姑蘇財賦益夥法制益難  
理庶務尤詳于治皖任兩郡幾九載陞山東布政司  
左叅政及去任兩郡士民皆建祠奉祀樹碑頌德再  
移浙藩又改晉省以平盜功蒙賜金幣辛卯陞本司  
右布政使壬辰丁外艱制滿復除河南右布政使時  
鄢陵盜起討平之亦得賜以金幣丙申轉本司左布  
政使冬陞都察院右副都御史巡撫山東地方時魯  
府恣惡抗疏以聞得遣廷臣會勘詔奪其祿并革護  
衛地方藉以寧謐繼以原職總理河道經畫河防利  
弊丁酉以九廟成奉詔進通議大夫己亥以皇

太子立復奉詔廕一子入監讀書旣乘輿南狩迎於磁復改巡撫河南時車駕經過經理周悉事竣復賜金幣汴中大饑且疫上疏請賑情詞激切同事者覽而難焉曰豈得念吾屬而坐使斃中州數百萬之生靈哉脫有咎某請任之疏上得發帑銀二十萬兩命大臣賑貸之汴民少蘇焉已亥冬汴中薄城內外火燎頻發未幾行臺亦災引咎乞歸因得賜閒田里爰築別墅以居日閉閣著書於諸理亂黜陟不相聞問時或乘籃輿課耕隴畝亦或登高賦詩興盡乃反與邑中薦紳燕會作九逸圖得優游卒老庚申九



月方執簡對賓倏忽告逝享年八十一歲才氣英發  
對客揮毫詩賦立就宛若宿構然雋爽豪逸上追古  
人凡海內賢達及藝文之士望形影從聽聲嚮赴雖  
大位屢滯不究厥施而功實詞華流傳遠邇雖百世  
不泯也有辛巳集丙辰集各四卷烏鼠山人小集八  
卷擬漢樂府二卷擬西涯古樂府家譜各一卷安慶  
志三十卷秦安志二卷鞏郡記三十卷秦州志三十  
卷春秋本義十二卷並彙選唐雅雍音等篇皆已行  
於世其河嵩歸田諸集未梓者尚多

馬 昊

馬昊關中人昊長身驍捷善騎射舉進士爲監察御史擢按察僉事尋以御史時罪謫真定推官至則教吏士習武多布置鈎指民家有流劫奸盜亡命悉擒之再用前罪謫判開州吏士伏闕上言馬昊於真定稱保障甚宜真定請勿謫詔許之亡何蜀盜藍鄙叛侵掠蜀合四省兵討之未効吏部尚書言馬昊才可蜀按察僉事佐治兵昊至閱所部笑曰將不知兵若勝何擇驍勇材力之士千人分四隊隊各立長會賊來逼城昊夜出百騎舉砲擊賊營亂自蹈籍而悉兵從後乘之斬首四千級軍中皆喜以兵起未有者昊

曰此尚未見大敵胡足喜宜及勝用之遂前遇賊賊  
方陣左而伏兵於右爲應昊以正兵當左而身與兵  
百騎直搗伏伏驚潰趨左左陣亦潰兵合擊火其柵  
大破之斬騎將方四捕首虜降萬人遷副使治兵川  
東道賊延蔓勢尚張都御史高崇熙謀於副使張思  
齊招諭賊賊請降而乞駐劄臨清市空其民昊曰臨  
清市蜀襟喉上達重叙下連湖湘其地饒富沃衍胡  
可委賊自困獨益飭治兵募召豪傑賊困不敢東伏  
漢州平填未幾復反集衆至二十萬前後官兵俱敗  
績賊遂圍中江因謀嚮成都昊以五千騎馳赴中江

賊走窮追之與總督彭澤合擊大破殺賊酋廖麻子  
遂進右僉都御史巡撫蜀廖麻子死餘黨尚數萬竄  
於東鄉山推喻老人爲帥昊請于彭澤曰山險不便  
騎射深入賊爲主或返失便願發步兵三萬據出入  
要道賊當自餓死也澤如昊言賊窘果縛喻老人請  
降而它賊在遂寧渠縣者相繼平進副都御史逾歲  
虜亦不刺自西海犯松潘蜀大震昊招土番爲間取  
道夜掩虜虜驚潰獲馬及衣械夥事聞加祿俸一高  
珙筠熨人普法惡倡諸夷部立寨僭號攻劫昊率兵  
捕破之降者萬計獨青山寨不下昊行周視寨曰此

固高絕水道可下也乃遣兵據泉口而撤南方圍待之兩日賊渴覘南圍薄夜走兵從後追捕首虜又萬人執普法惡誅之遷右都御史予一子錦衣百戶

王璠

王璠字廷瑞寧遠縣人少穎敏不凡入邑庠戴恭簡公以按察副使督學見而器之會同舍生侵學徬隙地衆悉於官衆更詭爲文投之縣代署璠名例出爲掾是歲癸卯當鄉試戴公乃牒縣以掾入試遂得舉自逮事至是凡八閱月耳明年甲辰登進士父疾且革聞報喜曰吾願畢矣尋卒聞訃奔歸伏地大慟築

廬墓傍手植松楸置祀田百畝服闋奉繼母徐氏之  
京授戶部主事監督臨清水次倉同事中貴剝剋萬  
狀酷流諸郡力與之諍暮月間縛奸胥輩二十餘人  
皆寘於法時有真部使之稱進員外郎丁內艱服闋  
進郎中奉勅總理遼東糧儲兼管屯種往歲邊費每  
告之于是杜請託謹權量尺布斗粟必親稽焉閱實  
得羨若米千萬數奸商射利不遂者朋誣于廷疏上  
其狀下御史臺治而法之凡百十餘人故事征商額  
外有楮價充公用悉罷之既還朝補貴州司奉勅償  
運漕河時值某藩之國河道壅滯夙夜乘小舟巡視

衣不解帶者四十餘日上便宜數事詔皆行之人以  
爲便尋擢山西布政司左叅議分守冀北道冀北古  
雲中地匈奴出沒不時戍卒餽餉恒虞不繼多方調  
畫方倚爲重而竟以臺評罷歸南游至江淮愛楊爲  
文獻地遂僑寓焉未幾以疾卒年五十三璠天性亢  
爽瘡厭世之齷齪忍垢者事多直遂名以是得而謗  
亦隨之蓋自爲諸生伉直自許羣議攻人輕於一諾  
遂蒙不韙至落士籍及居官奉使知有國法不恤毀  
譽當商利交征之時獨搜刮弊端以賈羣怨卒中物  
論然而鄉評宦績則卓乎爲明時之鼎呂矣

侯一元

侯一元字應乾秦安人正德甲戌進士授工部都水司主事歷兵部職方郎中病免久之用薦起爲吏部驗封郎中卒于官一元廉介不可干以私家居無所交生人有請託難拂其意卽謂之曰若得罪幾何贖直良苦我不能見此人又不忍困若也我且代若罪率赧沮不復言亦不失其歡心

暢華

暢華字子實隴西人資性偉異六歲卽知學有奇志爲諸生極爲遂菴先生所重從學者日至其門領弘



治甲子鄉舉閱年父卒哀毀過禮終制舉正德丁丑  
進士拜無錫令興滯補弊庶事畢舉撫按交薦其能  
嘉靖癸未擢刑部廣東司主事論刑明允戊子奉命  
決獄畿內平反實多尋陞刑部員外郎己丑復奉命  
審錄平反一如畿內有疏論條例繁難未報丁內艱  
歸服除庚寅陞山西按察僉事值岢嵐寇發官莫能  
制撫按以華往不旬日渠魁悉殄脅從盡釋撫按又  
以河東道累值凶荒請勅專以華分巡河東道弭盜  
安民時論偉焉有倡白蓮教者取其人至以禍福禮  
義諭之其人感泣卽散去後猗氏有爲此教者誅戮

不可勝言人乃知華曲突徙薪之恩博矣僉事三年  
撫按牒交上而陞遷且邇遂奮袂起曰年將六十西  
山日薄盍歸乎來于是疏乞休致請至再四始得  
俞旨以歸

周 蕙

周蕙字廷芳別號小泉山丹衛人後徙居秦州因家  
焉年二十聽人講大學首章奮然感動始知讀書問  
字爲臨洮衛卒戍蘭州守墩聞容思段先生集諸儒  
講理學時往聽之有聞卽服行久之諸儒令坐聽旣  
而與坐講旣而以爲畏友有疑與訂論焉段先生勗

以聖賢可學教示進爲之方遂殫力就學究通五經篤信力行慨然以程朱自任當時見者亦翕然以爲程朱復出也咸敬信樂從之又授學于清水教諭安邑李公鼎得薛文清公之傳功密存省造入真純遂爲一時遠邇學者之宗總兵恭順侯吳瑾聞其賢欲延教其子蕙固辭或問故曰總兵以軍士役某召之役則往役召之教子則不敢往聞者嘆服侯亦不能強遂親送二子於其家以受教始納贄焉時肅蔣有二樂人鄭安鄭寧者啓王願除樂籍從周先生讀書其感發人如此後隱居秦州之小泉因以爲號著深

衣幅巾成紀之人薰化其德嘗遊西安與介菴子李  
公錦論學介菴由是大悟遂爲關西名儒渭南思菴  
薛公敬之執弟子禮師事焉秦州守數造其廬舉鄉  
飲賓謝不往巡按杜公禮徵求見講太極先天二圖  
不覺前席嘗正冠婚喪祭之禮以示學者秦人至今  
遵之迨老以父遊江南涉險訪之沒于楊子江人皆  
稱其孝而又重悲其死云